

3 Juan

He⁻ la⁻ jee' ga⁻tē' hnē⁻ je⁻ he⁻ ga⁻sih' Jwaa⁻

Ga⁻hih' juu' kih' Gayo he⁻ ga⁻ngēy' Ilu'

1 ¹ Jnä' dsa⁻gyuuh' kyaah' hnäh', siin⁻ juu' la⁻ kih' ome⁻ kyaan⁻,
Gayo, hi⁻ hnaan⁻ lä⁻kaa⁻ tuh⁻dsen⁻.

² Øøhn⁻ hi⁻ hnaan⁻, ngiin' kih' Dio mah' wa' dsa⁻ngēh' Ilu' kih'
ga⁻lä⁻jē⁻ ba'. Lä⁻koh' lluu⁻h⁻ hne⁻ kih' Dio, ja⁻ba⁻ lä⁻ja⁻ wa' chaah⁻ hne⁻
llu'. ³ Ga⁻jēē' dsen⁻ cha⁻miih⁻ ma' ya⁻nää' kō⁻llaa' øøh⁻ jne'. Ga⁻jmeeyh'
juu' lä⁻ ma⁻häh' ba' hne⁻ koo⁻ hweh⁻ kyaah' ju'dsoo'. ⁴ Sa⁻ cha⁻ ga'
jyoh' he⁻ jmee⁻ jēē⁻ dsen⁻ lä⁻koh' ga' he⁻ la⁻, he⁻ nuun⁻ tääh' ba' gyuu⁻
kyaan⁻ lä⁻koo⁻ la' ju'dsoo'.

⁵ Øøhn⁻ hi⁻ hnaan⁻, jmeeh⁻ ba' hne⁻ Ilu' lä⁻koo⁻ hä' ma' jmeeh⁻ be' kih'
øøh⁻ jne'. Hi⁻ cha⁻ga⁻miih⁻ Ilu' jmeeh⁻ kih' hi⁻ go⁻nää' ta⁻ jee' jyoh'. ⁶ Hi⁻
he' ga⁻kwa' juu' neh⁻ gwah⁻ ha⁻ lä⁻ koh' hnaah⁻ hnih'. Ja⁻ jmeeh⁻ Ilu'
hoh' kwēy⁻h⁻ he⁻ jmee⁻ bii' kiyh' cha⁻jwē' jee' ga⁻näy', jēē⁻ lä⁻ja⁻ lle'
kih' hi⁻ jmee⁻ ta⁻he' kih' Dio. ⁷ Hi⁻ he' na⁻nää' Ilu' dsē' kwaat⁻ kih' Jesús.
Sa⁻ ga⁻heeyh⁻ ni⁻ miih⁻ he⁻ ma' kwa⁻ dsa⁻ hi⁻ sa⁻ ga' ma⁻heeh⁻ juu' kih'
Dio. ⁸ Ää⁻ jmi⁻ jmeen' be' kih' hih' dsa⁻ hi⁻ ga⁻nää' kwa⁻ ju'dsoo'. Jēēh',
he⁻ jmee' jne' lä⁻ja⁻, jmee' jne' kō⁻joh' kyaayh' ba' ja⁻.

Ga⁻jmeey' Diótrefe he⁻ hliih'

⁹ Ga⁻siin⁻ kih' gwah⁻, pero Diótrefe sa⁻ hnøoy' jmee⁻ jnääh' mada⁻
kiyh', jēēh' hñii' bih' hnøoy' jmeey' hih'. ¹⁰ He⁻ja⁻ wa⁻ra⁻ ga⁻tē' jee' niin⁻
jee' ja⁻, mi⁻liihn⁻ dsēy' he⁻ ngēy⁻ kooyh⁻ juu' jwi⁻ mah' jmeey⁻ juu'
ta⁻juu' kyaa' jnääh'. Hi⁻ sa⁻ lēē' kiyh' he⁻ jmeey⁻ lä⁻ja⁻. Lä⁻kye⁻ øøh⁻ jne'
hi⁻ dsa⁻nää' jee' ja⁻ sa⁻ heeyh⁻. Hi⁻ lä⁻ja⁻ hay⁻ kih' hi⁻ hnøø' heeh⁻ øøh'
jne', lä⁻jiih' lleey⁻ neh⁻ gwah⁻ go⁻te⁻.

Ga⁻hih' juu' kih' Demetrio he⁻ ga⁻jmeey' he⁻ Ilu'

¹¹ Øøhn⁻ hi⁻ hnaan⁻, ta⁻ jmee⁻ lä⁻koo⁻ jmee⁻ hi⁻ ga⁻nää' jwē' hliih'.
Jmee' he⁻ Ilu' jmah' ba'. Jēēh' hi⁻ jmee⁻ he⁻ Ilu', laa⁻ kyaa' Dio. Pero hi⁻
jmee⁻ he⁻ hliih', sa⁻ ga' ma⁻heeyh⁻ kih' Dio.

¹² Ga⁻lä⁻jēē⁻ ba' hlēēh⁻ Ilu' kih' Demetrio. Lä⁻kye⁻ ju'dsoo' hlēēh⁻ Ilu'
kiyh'. Ja⁻ba⁻ lä⁻ja⁻ jnääh' jmee⁻ jnääh' ju'dsoo' kiyh' ka⁻läh'. Hi⁻ neh'
hnäh' hlēēh' jnääh' ju'dsoo' jmah' ba'.

¹³ Cha⁻ cha⁻ga⁻miih⁻ he⁻ hnoon' jwēēhn⁻ hne⁻, pero mo⁻so⁻ ma⁻siin⁻ ga'
jnä'. ¹⁴ To⁻chah' la⁻ hnoon' na⁻jēēn⁻ hne⁻ mah' llan' juu' kō⁻joh'.

¹⁵ Wa' hii' tii' tuh⁻hoh'. Ome⁻ jnän⁻ jmee⁻ Dio kyah'. Jmee' Dio kih'
lä⁻jaa⁻ lä⁻jaa⁻ ome⁻ jnän⁻ hi⁻ tääh' jee' na⁻.